

Mbanjgyanghdouz: Aenmbanj Okmingz Vwnzva Gyaez Va'mbu Gag Miz Daegsaek

江头村：独具特色的爱莲文化名村

□ Lanz Langz Yi Siengz ingj

Myab yawj Mbanjgyanghdouz.

Mbanjgyanghdouz caeux youq bi 2005 couh ndaej bingz guh “Cungguek aenmbanj gaeuqgeq gig ngamj guh lijyouz”, bi 2006 ndaej Gozvuyen goengboun guh “daengx guk cungdenj vwnzvuz baujhu danhvei”, “vwnzva gyaez va'mbu Gyanghdouzcouh” ndaej lied haeuj Guengsae buek daih' it feihvuzciz vwnzva yizcanj mingzloeg, bi 2015 ndaej aen mingzdaeuz “daengx guk aenmbanj youqndwi ceiq gyaeunde”. Geij bi neix daeuj, youq dangveij cwngfuj baihgwnz haeujcoengh lajde, Mbanjgyanghdouz dawz hong henhoh aenmbanj gaeuqgeq caeuq lijyouz haifat doxcaemh bae guh, aeundaej yaugoij haemq ndei, dan bi 2015 couh miz 15 fanh vunz bae ndaw mbanj cetyouz.

Mbanjgyanghdouz youq hamq baihsae Dahhohlunz dep Hawgiuj-vuz Cinghswhdanz Cin Lingzconh Yen, liz yienhsingz 20 goengleix, singz Gveilinz 32 goengleix. Seizneix daengx mbanj miz 180 ranz 800 lai vunz. Aen mbanj neix dwg gij lwglan boux vwnzyozgyah, cez-yozgyah, bouxcaux lijyoz okmingz guk raeuz Couh Dunhyi haenx comzyouq, Ciuhringz Hungzvuj bidauez (gunghyenz bi 1368), gij lwglan Couh Dunhyi daj Huznanz senj daeuj youq caemhcaiq hwngfat daengz seizneix. Ndaw mbanj lij


louzce miz gij ranz cien caep vax gang seiz Ciuhringz Ciuhringz hwnjguh haenx 180 aen, daengx mbanj aenranz cienheu vaxmong, faex benj dapgaq, yiemhranz doxdaeb, gaeuqgeq ndeiawj.

Byaij haeuj ndaw mbanj bae, couh hawj vunz gamjsouh daengz raq heiq gaeuqgeq ranzvunz mizmingz ndeu, daegbied dwg gij ranz gaeuqgeq doxdaeb bingzbaiz, doucueng deu ven guenghva, roeniq bu rinmaxluenx haenx, gizgiz loh gij romcomz vwnzva lizsij ranzcaep Yenz Mingz Cingh sam ciuh neix okdaeuj. Mbanjgeq funghgingj gyaeunde, baihbaek miz Ndoivuengzgya baenz bi faex heusdswd raemxmoq sawrwenx laerat haenx, baihnanz ing Byagouj-sien, baihsae nangq Gyaiqhajceij, baihdoeng daengj Byabizgya. Naj mbanj doenghnaz gvangqyub, sam diuz dah raemx sawyau lumj diuzsaihu nei, hopngomx aenmbanj lae coh baihnanz, baihlaeng mbanj faexgeq sang hung, mwncup heuswd. Gij daegbied yienhda haenx cix dwg gwnz goemqdou gak aen ranz cungj venj miz gep baiz ranzgviq caeuq vuengzdae q fung hawj haenx, “Genhswng”、“Dungzcih”、“Cih-yen”、“Ranzdaisij” doenghgij baiz neix miz 200 lai gep, caiqlij miz “bohlwg hanlinz”、“seiq daih gijyinz” doenghgij baizdou neix dem; engq

hawj vunz da' byaengq haenx dwg ca mbouj geijlai ranzranz dwg ranz dang hak lingx fungloeg ne, seizhaenx ndaw mbanj 80% ranz cungj miz vunz dang hak hung, caiqlij bouxboux mbouj dam mbouj nduk seuqcingh guhhak, caen hawj vunz boiqfug. Ndigah seizneix ndaw mbanj lij miz “Gai Siucaiz”、“Luengq Gijyinz”、“Laeuz Cinsw”. 《Lwnh Gyaez Va'mbu》 dwg bien faenzcieng okmingz gwnzbiengz riuzcienz Couh Dunhyi, ndigah ndaw mbanj miz aen ranz “Coengceiz Gyaez Va'mbu” ndeu, dwg mihcoj ranz singq Couh, ndawde venj baiz deu miz bien faenzcieng 《Lwnh Gyaez Va'mbu》 caeuq vah son guhvunz ciuhcoj, comz caeqbaiq, son'gyauq youq ndawde, baenz aen gihdi youqgaenj “vwnzva gyaez va'mbu”. Cawz aenranz coengceiz le, ndaw mbanj lij miz ranz daisij, ranz ancazsi, ranz fungcwnz dafuh, ranz dungzcihfuj, ranz haj daih cihyen, ranz gaijyenz, laeuz lwgsau doenghgij ranz neix, vanzlij miz Giuzhohlunz, cingjmaenzleij, cingj-coengmingz caeuq Byabizgya, Byayaenqhak doenghgij dieg gingi ndeiawj neix dem, hawj vunz yawj le raraen di rizgeq ndeu, gamjsouh ndaej di ronghyab vwnzva lijyoz Couh Dunhyi ndeu.



▲ Riengz diuz roenmaxluenx bae ra vwnzva gaeuqgeq.



▲ Ranz gaeuqgeq baiz baenz coij caen caezcingj.



▲ Gyanghongh raen riz gaeuqgeq.



▲ Aencingj gaeuqgeq.



▲ Gaiq baizfangh cungcig.



▲ Diuz Gaicinsw doeng bae gyae.



▲ Aenranz coengceiz gyaez va'mbu ndaw mbanj.



▲ Giuzrin faex geq, raemx lae yienj gaeuqgeq.



▲ Giuzrin iq vang gvaq gwnz dah.



▲ Aenranz seiq daih hanlinz.